

**Ukioq 2025-imiit nutaamik umiarsuarmik sinersortaateqalernissaa siunertaralugu
Naalakkersuisut pilersaarummik suliaqarnissaannik Inatsisartut
aalajangiiffigisassaattut siunnersuut, taamaasilluni pilersaarut kingusinnerpaamik UKA
2023-imi saqqummiunneqassaaq.
(Inatsisartunut ilaasortaq Anders Olsen, Siumut)**

pillugu

Sanaartornermut Ataatsimiititaliap

Siunnersuutip aappassaaneerpeqarneranut

ISUMALIUTISSIISSUTAA

Sanaartornermut Ataatsimiititaliap suliarinninnermini ukuninnga inuttaqarpoq:

Inatsisartunut ilaasortaq Kristian Jeremiassen, Inuit Ataqatigiit, Siulittaasoq
Inatsisartunut ilaasortaq Siverth K. Heilmann, Atassut, siulittaasup tullia
Inatsisartunut ilaasortaq Harald Bianco, Inuit Ataqatigiit
Inatsisartunut ilaasortaq Anders Olsen, Siumut
Inatsisartunut ilaasortaq Jens Kristian Therkelsen, Siumut

UKA 2022-imi ulloq 20. oktober siullermeerinninnerup kingorna ataatsimiititaliap siunnersuut misissorpaa.

1. Siunnersuutip imarisaa siunertaalu

Ukioq 2025-miit sinerissami ilaasunik angalassinisaaq qanoq isumagineqarnissaata pilersaarusiornissaa siunnersuummit siunertarineqarpoq.

Maannakkut MS Sarfaq Ittuk kiffartuussinissamik isumaqatigiissutaata 2025-mi atuukkunnaarnerata kingorna ingerlaannarnissaa naatsorsuutigineqarsinnaangilaq.

2. Siunnersuutip Inatsisartunit siullermeerneqarnera

Siullermeerneqarnerani Naalakkersuisunit allannguutissatut siunnersuut tuullittooq saqqummiunneqarpoq:

”2025 nallertinnagu ilaasunik angallassinisq pillugu Naalakkersuisut pilersaarusiogguneqarnissaannik Inatsisartut aalajangiiffigisassaattut siunnersuut. Angallasseriaatsimut tamakkiisumut atatillugu periarfissani assigiinngitsuni missingersuutit aningaasaqarnikkullu kinguneqaataasussat pilersaarummi nassuiaatigineqassapput, inoqarfyllu amerlanerit tikinneqarsinnaanissaat ilanngullugu suliaqartoqarsimanissaat ilanngunneqassalluni. Pilersaarut kingusinnerpaamik UKA2023-mi Inatsisartunut saqqummiunneqassaaq.”

Aalajangiiffigisassatut siunnersuut akuersaartumik isummerfigineqartoq Naalakkersuisunit allannguutissatut siunnersuutigineqartoq annertuumik taparserneqarpoq.

3. Ataatsimiititaliap siunnersuummik suliarinninnera

Piffissaalluarallartillugu ilaasunik angallassinerep siunissami qulakkeerniarneqarnissaata pilersaarusiorneqartariaqarnera aallaqqaatitut ataatsimiititaliamit maluginiarneqartoq oqaatigineqassaaq.

Attaveqarnermut suliaqarfimmi piffissaq sivisooq pineqartarmat Arctic Umiaq Linellu kiffartuussinissamik isumaqatigiissutaat 2025-mi atorunnaartussaasoq ataatsimiititaliamit malugeqquneqassaaq. Taamaammatt pisariaqarpoq naalackersuinikkut piffissaalluarallartillugu aalajangiisoqareersimanissaa.

Naalackersuinikkut aalajangiinerit amerlanerpaanik isumaqataaffiusumik sulisoqarnissaa patajaatsumillu tunngaveqarnissaq ataatsimiititaliamit siunertamut tulluuttuusorineqarpoq.

Naalakkersuisunit pilersaarummik suliaqarnissaq pingaartinneqarnissaa, Naalakkersuisullu siusissukkut, ataatsimiititaliaq kisiat pinnagu, Inatsisartunili partiit tamaasa akuutinneqartarnissaasa qulakkeernissaa ataatsimiititaliamit neriutiginerpoq.

Arctic Umiaq Linemiit Angallaneq pillugu Isumalioqatigiissitap Isumaliutissiisutaani 2011-meersumi ilisimatitsissutigineqarmat, umiarsuarmik nutaamik pissarsinissaq 250 mio. kr.-ninik naleqassasoq, nalikilliliinerlu il. II. Ukiumut 57,7 mio. kr.-ninik kalaallit nunaata sineriaani angallassinisq akeqarumaartoq ataatsimiititaliamit malugeqquneqassaaq.

Taakkua naatsorsuutit kisitsisit 2009-minganneersunik tunngaveqarput, taamaammallu ataatsimiititaliaq isumaqarpoq, akit ineriartornerat eqqarsaatigissagaanni ukiumut aningaasartuutit ullumikkut qaffasinnerungaatsiarnissaat ilimagineqartariaqartoq.

Ataatsimiititaliamit aamma malugeqquneqassaaq, sineriammi najugaqarfiit assigiinngitsut sineriak sinerlugu angallassinerep naalackersuinikkut oqallisaasareenera, tamatumani

134/2019, aamma § 37-i tunngavigalugu apeqqutit: 86/2018, 137/2021, 159/2021, 68/2021 aamma 97/2022 immikkoortut oqallisaanerat innersuussutigineqassapput.

Taakkununga Naalackersuisunit assigiinngitsunit akissutit ilagaat, kiffartuussinissamik isumaqatigiissutit pissutigalugit, aningaasanullu inatsimmi oqaasertaliunneqartuni killiliussat angallassinissamillu pilersaarut tamakkiisoq pissutigalugu umiarsualiviit amerlanerusut tikinnissat periarfissaasimanngitsoq.

Taamaammat siunissami ilaasunik angallassineq pilersaaruserlugu suliaqarnermi aammattaaq aningaasanut inatsimmi killiliussat qanoq iliorluni allanngortinneqarsinnaanissat isiginiarneqassasut ataatsimiititaliamit inassutigineqassaaq.

Tamatumani ataatsimiititaliamit naqissuserneqassaaq maannakkut angallannissamut pilersaarutiniq umiarsuaq nutaaq kisimi pineqanngimmat. Umiarsuarli ilaasortaataq ullutsinnut tulluutissasoq, sukkanerussasoq, atortorinnerussasoq, Nanortalimmukarsinnaasoq, umiarsualivinnik amerlanernut tulassinnaasoq piffissamilu imaq sikusimatinnagu Upernavimmukarsinnaassasoq piumaneqarmat.

Tamatumani sinerissamut tamarmut, innuttaasunut takornariaqarnermullu iluaqutaanissaa qulakkeerniarlugu.

4. Siunnersuutip aningaasatigut kingunerisassai

Inatsisartut suleriaasianni § 33, imm. 1-imi allassimavoq aalajangiiffigisassatut siunnersuutip piviusunngortinnerani aningaasaqarnikkut allaffissornikkullu kingunerisassat siunnersuutip tunngavilersuutaani aallaaserineqassasut.

Tassunga naapertuuttumik siunnersuummi siunnersuutip aningaasatigut kingunerisassai allaaserineqartut AC-tullu suliaqartup ukiumut akissarsiassaataq sisamararterutaatut naleqassasoq naatsorsuutigineqartoq ataatsimiititaliamit maluginiarneqarpoq.

Siunnersuutip piviusunngortinnerani aningaasatigut kinguneqartussaaneq ataatsimiititaliamit nalilersorluarneqarpoq. Ataatsimiititaliamit maluginiarneqarpoq AIS2023 konto pingarneq 72.20.05 – Ilaasunik angallassinermut tapiissutit (Tapiissutit aningaasaliissutit) tulluuttut takuneqarsinnaapput:

”Suliassaqarfimmi kiffartuussinissamik isumaqatigiisummik misissuinnermut malitseqartitsinermullu atatillugu aningaasartuutit kiissalu neqerooruteqartitsinissami aningasartuutaajunnartut konto pingarneq manna aqqutigalugu akilerneqassapput.”

Aalajangiiffigisassatut siunnersuummit imaluunniit allannguutissatut siunnersuummit suliaqarnermit naatsorsuutit uniorlugit aningaasartuuteqarnerusoqassappat ataatsimiititaliaq naliliivoq, aningaasartuutit taakkua konto pingaarnermit aningaasalersorneqarsinnaajumaartut AUL-imut aningaasatigut tapiissutit kisimik pineqarnatik, kisiannili aamma Kalaallit Nunaat tamakkerlugu timmisartuussinerit aamma immakkut angallassinert.


Ataatsimiititaliap inassutai

Ataatsimiititaliap isumaqatiittup Naalakkersuisut allannguutissatut siunnersuutaata akuerineqarnissaa inassutigaa.

Taamatut oqaaseqarluni isumaliutissiisummillu allassimasutut paasinnilluni matumuuna ataatsimiititaliap siunnersuut aappasaaniigassanngortippaa.




Kristian Jeremiassen
Siulittaasoq




Siverth K. Heilmann
Siulittaasup tullia



Harald Bianco



Anders Olsen



Jens Kristian Therkelsen